

DEO OPTIMO MAX. UNI ET TRINO, VIRGINI DEI-PARÆ, ET S. LUÇÆ,

Orthodoxorum Medicorum Patrono.

BIU Santé
Médecine
Paris

QUÆSTIO MEDICO-CHIRURGICA QUODLIBETARIIS DISPUTATIONIBUS


manè discutienda in Scholis Medicorum, die Jovis sextâ mensis

Martii, anno Domini M. DCC. LXXXVIII.

M. MARIA-NATALE DE GEVIGLAND, Regiorum in Germaniâ
Ducum & Militum Nosocomiorum in ultimo bello Medico Regis
ordinario, necnon omnium & singularium Artis partium, antiquo
Professore, Doctore Medico, Præside.

*An novum instrumentum Ophthalmostat * dictum, ad operationem Cataractæ aliis sit
anteponendum?*

I.

HUMANUM corpus innumeris obnoxium est morboris affectibus, quos nec
diæta, nec medicamenta quæcunque interna sanare valent. Quid etenim ope-
rari possunt contra luxationes, fracturas, vesicæ calculum, excrescentias poliposas,
vulnera, & cujuslibet partis externæ vitium? Isti omnes morbi, manûs, instrumen-
torum, medicamentorumque externorum applicationem exigunt. Pars verò illa Me-
dicinæ, quæ manu sanat, & tota in sectionibus externisque remediis applicandis ver-
satur, nuncupaturque Chirurgia, à primis hominum incunabulis ducit originem, &
fortasse cœteris artis sanandi partibus antiquior. Dum etenim primi homines parçè
& frugaliter victu utebantur, neque pravis moribus luxuque corrupti, nundum
nativum robur pristinamque corporis vim amiserant, morboris affectionibus
internis minimè erant obnoxii, neque internis indigebant remediis. At contra,
necessariò, haud secus ac nostræ ætatis homines, læsiones externas, quæ manûs
auxilio indigent, patiebantur. Quid etenim à casu ab alto, ab ossium fracturis vel
cranii, à feratamorsu, à vulneribus ab aliis hominibus inflictis, à luxationibus
contusionibusque illos defendere potuisset? Has externas læsiones curare & sanare
variis mediis tentarunt, variaque excogitarunt remedia; nullum est dubium,
quin primò, totam industriam & sagacitatem ad fluentem ex aliquâ parte corporis
sanguinem sistendum, ad spinas alicui parti infixas extrahendas, impenderint. 
variis tentaminibus, repetitisque omnium ætatum experimentis, & observatio-
nibus, ad hunc perfectionis & utilitatis gradum illa pars Medicinæ assurrexit,
ad quem evedam reperimus. Quot etenim mirandæ, commendabiles, inventæ
& excogitatæ sunt operationes? Quot è letho quotidie homines eripiunt? At non
nobis est animus de omnibus Chirurgiæ operationibus verbum facere; unam eli-
gimus, non infimam quidem, extractionem cataractæ scilicet, de quâ hîc agendum
sit. Exponemus, quid sit cataracta, in quo consistat illius extractio, quænam sint
instrumenta, quorum ope peragitur, & sententiam nostram pluribus rationibus
suffultam dicemus de novo instrumento ad hanc operationem invento & propo-
sito *Ophthalmostat* dicto.

II.

CATARACTA nihil aliud est quàm lentis cristallinæ opacitas, ex variis
observationibus & experimentis circa hujusce sententiæ veritatem nullum
jam superest dubium. Opacitate vero oriâ in cristallino, radii luminis in corneam
incidentes, pervenire nequeunt ad retinam, in quâ sit visio, quoniam illis cris-

* *Ophthalmostat* D. Guérin

tallinus transitum recusat; undè absoluta cœcitas oritur. Aliquando tamen sola capsularum cristallarum opacitas, cœcitatem quoque producere valet, & speciem cataractæ procreat. Quando autem medicamenta, tum interna, tum externa prudenti sagacique manu tractata, ad hanc oculi affectionem sanandam, incassum adhibita fuerunt; nulla alia spes visus recuperandi superest, nisi in operatione chirurgicâ, quâ sectione institutâ corneæ lucidæ parti inferiori, cristallinus foras extrahitur, vel acu deorsum deprimitur; sed illa methodus operandi jamdudum ex praxi proscripita est. Extractio cristallini ab omnibus antepontur, extracto etenim cristallino, tollitur morbus. Post verò depressionem, potest resilire & in suum locum restitui, quod accidisse multis observationibus constat, ita ut ad alteram operationem deveniendum fuerit. Ad hanc operationem ritè & egregiè perficiendam, plura absolute requiruntur, 1^o. instrumentum parti in quâ celebrari debet accomodatum, egregiè fabrefactum. 2^o. Ex parte verò Chirurgi, solertia longâ praxi acquisita, prudentia, tuta & exercitata manus, cognitio intima oculi partium. Nulla quidem, ex operationibus, quæ in humano corpore solent institui, tantam postulat dexteritatem manûs, quàm cataractæ extractio: in parte etenim celebratur tam exquisitâ sensibilitate, tantâque mobilitate donata, ut oculi globus nullo vix medio stabiliri possit. Minimo instanti temporis, huc, & illuc, sursum, deorsum, extrorsum, introrsum movetur, præsertim quando ab aliquo externo corpore vel levissimè tangitur.

I I I

OPERATIO cataractæ consistit, in sectione semicirculari partis inferioris corneæ pellucidæ, propè ejus insertionem cum scleroticâ *, in incisione anterioris capsulæ cristallini, & in cristallini ipsius extractione ope levis pressionis supra partem oculi superiorem, ita moderatæ, ut sola per vulnus corneæ inflictum, lens cristallina expellatur; cavendo ne cum illâ, corpus vitreum, vel nimia humoris aquosi copia effluat. Antequam verò sese ad hanc operationem perficiendam accingat Chirurgus, æger in situ comodo collocetur, necesse est: tunc manu dextrâ, si in oculo sinistro, manu sinistrâ, si in oculo dextro, operandum sit, sumit instrumentum, momentum spectat, quo oculus immobilis manet, vel tentat illum stabilire quantum potest; palpebram inferiorem ope digitorum medii & indicis deprimit, & versus partem mediam corneæ externam prope ejus insertionem cum scleroticâ, instrumenti cuspidem dirigit, pertundit corneam, introdudo in camerâ anteriore instrumento usque ad pupillam, cuspidem dirigit, per pupillæ foramen, adducendo leviter manum antè, capsulam cristallini incidit. Illico motu contrario laminam ceratomi ex pupillâ retrahit, usque ad partem oppositam corneæ pellit, illamque pertundit ex intus ad extus, æquali à scleroticâ distantia, ac illa in quâ perforata est exterius cornea; pellendo tunc leviter ceratotomy, absolvit incisionem propius quam potest scleroticæ, ita ut semicircularis sit sectio: cavendum est interea ne acie instrumenti membrana iridis attingatur & ne secetur vel dilaceretur, graviora etenim exurgerint symptomata.

I V.

AD sectionem corneæ rectè perficiendam, non tantummodo requiritur instrumentum, cujus ope leviter, citò, exactè, sine conatu vel minimo, & cum levissimo dolore incidi possit, sed & magnopere interest ut illud instru-

* Attamen quando cornea adeò parva est, ut incisio in illâ sufficiens ad transitum cristallini fieri nequeat, tunc incidi potest sclerotica sine ullo incommodo. Constat etenim observatione recenti, sectionem scleroticæ nullum inferre periculum; è contra sub quodam respectu sectioni corneæ anteponendam esse. Tribus ab hinc circiter mensibus D. Demours, hujusce Facultatis Doctor-Regens, in muliere . . . cui cornea strictior erat, incidit scleroticam, præsentibus DD. Sallin, Pujo & Montagu. Facillimè cristallinus exiit. Paululum sanguinis dat illa sclerotica sectio, eo quod in illa sint vasa sanguinea, sed propter scleroticæ majorem crassitudinem & vasa sanguinea catrix celerius formatur & firmior evadit: post quadraginta etenim & octo horas coaluit vulnus, nullo remanente cicatricis vestigio, ita ut oculus in quo instituta fuit operatio recognosci hodie nequeat; dum semper quando sectio facta fuit in corneâ, loco incisionis linea alba remanet.

mentum, manu Chirurgi solertissimi & exercitatissimi ducatur. Sola etenim varios oculi motus, tam celeres & improvisos sequi potest, & incisionem in loco proposito facere. Moveatur, verbi gratiâ, oculus, eodem momento, quo cuspis ceratotomi insigitur in corneam, nisi illico directionem mutet manus Chirurgi, incisio non erit qualis fieri debet; vel ærtior erit, quam ut præbeat cristallino transitum, vel incidetur cornea supra pupillam, & cicatrice perfectâ, remanebit macula quæ visioni erit obstaculum; vel sese instrumento obijciendo oculus, pertundetur iris, undè totius oculi quandoque inflammatio, suppuratio, omnium oculi partium destructio, aut humorum opacitas, & ad minimum iridis valdè deformis supererit irregularitas. Ex variis instrumentis ad incisionem corneæ propositis, illud omnibus aliis valdè anteponendum & magis idoneum nobis videtur, quod solum ad operationem sufficit. Instrumentum illud nihil aliud est, quam parvulus scalpellus, manubrio eburneo instructus, vigenti linearum circiter longus, lanceolæ similis; major illius latitudo trium linearum sensim decrescens à basi ad apicem: duas habet margines, superior obtusa, incidens inferior, excepto tamen apice ex utraque parte incidente ad longitudinem unius & dimidiæ lineæ. Insignis simplicitatis est illud instrumentum, nullum tamen nobis videtur magis idoneum, aptumque ad incisionem corneæ faciendam; lamina ob suam formam & amplificationem ab apice ad basim, prout in oculum penetrat corneam incidit, ita ut effluere humor aquosus nequeat. Pars illius superior obtusa est, ne palpebra superior incidipossit. Hocce instrumento perita manus armata, quotidie cum feliciori successu extrahit cataractam, & innumeros oculis captos luci reddit. Aliud instrumentum nuper inventum & excogitatum, tanquam magis idoneum & utilius ad corneæ sectionem propositum fuit, *Ophthalmostat* dictum, eo quod existimetur gaudere facultate oculi stabiliendi, simul & sectionis eodem instanti operandæ. Descripto instrumento, palamque facto, modo quo agit, expositisque variis incommodis ex illius actione & usu eruentibus, nostram de hocce instrumento sententiam candidè exponemus.

V.

INSTRUMENTUM illud constat, ex annulo argenteo, semi-lineæ crassitudinis, cujus diameter sex vel octo linearum est, illiusque margo inferior manubrio quoque argenteo juncta est ad angulum rectum. Constat & ex lanceolâ cujus basis, eâ parte quâ plana est, juncta est manubrio, quod cum planâ facie lamellæ angulum rectum efformat. Longitudo ferri lanceolæ sex vel octo linearum, latitudo ad basim trium aut quatuor linearum, & sensim decrescit usque ad apicem. Manubrium annuli tres aut quatuor pollices habet. Suprà illud juncta est cavitas quadrata oblonga, in quâ reperitur occultum organum, cujus ope lanceola à margine dextrâ annuli ad sinistram, quasi secundum illius diametrum movetur. Ad faciendam sectionem corneæ ope hujusce instrumenti, applicatur annulus oculo, ita ut margines correspondeant circumferentiæ corneæ, & pre-mendo pars convexa corneæ promineat. Emisso organo occulto, pellitur lanceola, & à margine dextrâ annuli ad sinistram transeundo, partem corneæ prominentem incidit; non verò satis ut sectio corneæ facta sit. Oportet ut secetur cornea in loco convenienti, ut sectio sit semicircularis, & partem inferiorem circumferentiæ corneæ sequatur, ut sine commotione fiat & non transeat supra pupillam, maximique momenti est, ut corpus vitreum non ex oculo effluat, ut intacta iris remaneat, & in operatione minimè oculus comprimatur. Hæc autem omnia difficile nobis videntur obtineri posse ex usu hujusce instrumenti. Tanta est enim oculi sensibilitas & mobilitas, ut quam maximè difficile sit eum quocunque modo stabilire: at ope istius *Ophthalmostat*, oculus immobilis contineri nequit, quin magna adhibeatur pressio; si nimium comprimatur oculus, prominentia corneæ per annulum nimia erit, emissâque lanceolâ, non tantummodo secabitur cornea, sed & iris secari poterit; illud præsertim timendum est, quando iris est convexa, quod sæpè in quibusdam oculis observatum fuit; in hoc casu prope modum inevitabilis est iridis incisio, quippe illius convexitas compressione augetur. 2º. Em issâ lanceolâ, cuspide feritur oculus, & nisi violentissimâ

compressione contineatur, certe dimovebitur, & cornea incidetur in variâ parte, prout sese movebit oculus; si dimoveatur in puncto temporis, quo agit lanceola. Se moveat, verbi gratia, oculus versus angulum internum & inferius, incidetur cornea supra pupillam transversaliter. se obiciat cuspidi, perpendiculari quasi directione pertundetur cornea, & iris incidetur. Præterea acies non secat feriendo, nisi magnâ vi propellatur; indè commotio in oculo producitur. Varia hæc incommoda ex usu istius instrumenti exurgunt, vitari nequeunt; quandoquidem nec oculus exacte contineri ope hujusce *Ophthalmostat* sine maximâ compressione nec illius actio retardari, nec illius directio potest mutari. Transeat ut mediante hocce instrumento, sectio corneæ fieri possit, qualis ope ceratotomi operatur; id fieri nequit absque compressione. At maximi momenti est, ut illa pressio solvatur simul ac sectio terminatur; aliundè corpus vitreum ex oculo efflueret, si vel minimo instanti, sectione factâ, continueretur pressio, & iris decideret supra lanceolam in camerâ anteriore remanentem. Pressio autem cessare nequit quin removeatur paululum ab oculo instrumentum, tunc lanceola ab iride removetur, sublevari partem corneæ sectam, aperitur vulnus, & impossibile est ut corpus vitreum non elabatur. Præterea lanceola ita disposita est ut impossibile sit eam exacte acuere, & aliud instrumentum requiritur ad capsulæ anterioris incisionem. Attamen, inquit, optimè ope *Ophthalmostat*, incisio corneæ super cadavere perficitur. Id non recusio, sed valdè differt oculus viventis, ab oculo cadaveris: in cadavere omninò & sensibilitate & mobilitate orbatur, non superanda est illius mobilitas quæ nullum obstaculum operationi affert, comprimari potest quantum libuerit, accidentia quæ ex compressione exurgerent non timenda sunt. Tandem vix unum aut alterum exemplum operationis in vivente cum eventu felici factæ ope hujusce instrumenti, afferri potest. Ex his quæ exposuimus de cataractâ, de operatione, de instrumento ad illam congruo, de novi *Ophthalmostat* modo utendi & incommodis, concludere rectè possumus:

Ergo novum instrumentum Ophthalmostat dictum, ad operationem Cataractæ, aliis non est anteponendum.

DOMINI DOCTORES DISPUTATURI.

- | | | |
|---|---|---|
| <i>M. Felix VICO-D'AZYR, è
Regiâ Scientiarum Academiâ,
Serenissimi Comitis Atrebatum
Consiliarius Medicus, Regis
Medicorum Nanceianorum Col-
legii Socius honorarius, &c.</i> | <i>M. Henricus-Joannes BAGEF, Rei
Herbariæ Professor,</i> | <i>M. Petrus DE LALOUETTE,
Regii Ordinis Eques,</i> |
| <i>M. Antonius-Chaumont SABA-
TIER, Regis in Portu Bres-
tensi Medicus,</i> | <i>M. Carolus-Jacobus SAILLANT.</i> | <i>M. Josephus-Maria-Franciscus
LASSONE, Eques, Regi in
Sacro Consistorio Consiliarius,
Regi ab omnibus Consiliis,
Archiatrorum comes, Serenissi-
mæ Reginæ Medicus Prima-
rius, è Regiâ Scientiarum Aca-
demiâ, Universitatis Medi-
cinæ Montpelienfis Doctor ag-
gregatus & honorarius, Regius
Librorum Censor, &c.</i> |
| <i>M. Joannes - Franciscus DE
LALOUETTE, Eques,</i> | <i>M. Theobaldus NIZON,</i> | <i>M. Petrus BECHER, antiquus
Facultatis Decanus, Regia
Hispaniarum Infantis dum
viveret, necnoa Regii exerci-
tûs ad Infimum Rhenum in
ultimo bello Medicus primo-
rius.</i> |



Proponebat Parisiis, JACOBUS-AMBROSIUS LAUBRY, Rhemus, Medicus
Doctor Rhemenfis nec-non Saluberrimæ Facultatis Parisiensis
Baccalaureus, Theses Auctor, A. R. S. H. 1788.